



REPUBLIKA E SHQIPËRISË

**KUVENDI I SHQIPËRISË
KOMISIONI PËR EKONOMINË DHE FINANCAT**

Tiranë, më 30.10.2018

Dokument parlamentar

(Komision përgjegjës)

R A P O R T

**PËR PROJEKTLIGJIN “PËR RATIFIKIMIN E MARRËVESHJES SË FINANCIMIT
NDËRMJET KËSHILLIT TË MINISTRAVE TË REPUBLIKËS SË SHQIPËRISË,
REPUBLIKËS SË MALIT TË ZI DHE KOMISIONIT EVROPIAN, PËR POGRAMIN E
VEPRIMIT TË BASHKËPUNIMIT NDËRKUFITAR IPA II, MALI I ZI - SHQIPËRI,
ALOKIMET E VITIT 2016”**

I. Hyrje.

Komisioni për Ekonominë dhe Financat, në cilësinë e komisionit përgjegjës, në mbledhjen e datës 30 tetor 2018, shqyrtoi projektligjin “Për ratifikimin e marrëveshjes së financimit ndërmjet Këshillit të Ministrave të Republikës së Shqipërisë, Republikës së Malit të Zi dhe Komisionit Evropian, për pogramin e veprimit të bashkëpunimit ndërkufitar IPA II, Mali i Zi - Shqipëri, alokimet e vitit 2016”, propozuar nga Këshilli i Ministrave. Komisioni për Ekonominë dhe Financat e shqyrton këtë projektligj në cilësinë e Komisionit përgjegjës dhe sipas procedurave të parashikuara në nenet 32-39 të Rregullores së Kuvendit.

Në mbledhje ishin të pranishëm, për të paraqitur projektligjin dhe për të dhënë sqarimet përkatëse, Sekretari i Përgjithshëm i Ministrisë për Europën dhe Punët e Jashtme dhe përfaqësues të tjerë të kësaj ministrie.

II. Përmbajtja e projektligjit.

Marrëveshja është miratuar dhe nënshkruar në dhjetor të vitit 2017 dhe synon sigurimin e financimit për alokimet e vitit 2016, në kuadër të programit të veprimit të bashkëpunimit ndërkufitar IPA II ndërmjet Malit të Zi dhe Shqipërisë. Ky program ka qëllim të kontribuojë në zhvillimin social-ekonomik të zonave ndërkufitare dhe të rrisë bashkëpunimin midis dy vendeve, nëpërmjet ndërhyrjeve të përbashkëta. Programi mbulon një territor prej afro 12 mijë km², me një popullsi prej mbi 749 mijë banorë dhe synon zhvillimin e qëndrueshëm të tij, duke i dhënë prioritet fushave të mëposhtme:

- Nxitjes së turizmit, si dhe trashëgimisë kulturore e natyrore;
- Mbrojtjes së mjedisit, nxitjes së përshtatjes dhe lehtësimit ndaj ndryshimeve klimatike, parandalimit dhe menaxhimit të rrezikut;
- Nxitjes së punësimit, lëvizjes gjeografike të punonjësve dhe përfshirjes sociale e kulturore përtej kufirit.

Programi do t'u krijojë mundësi përfituesve të të dyja vendeve për të shkëmbyer përvojën e njohuritë. Ai do të mbështetet edhe në përmirësimin e politikave publike midis autoriteteve kontraktore, rajonale e lokale në zonat përkatëse.

Financimi do të sigurohet nëpërmjet Instrumentit të Asistencës së Paraanëtarësimit IPA II, përmes një granti të BE-së prej 1.7 milionë eurosh për të dyja vendet. Pjesa tjetër e financimit prej 300 mijë eurosh, do të sigurohet nga bashkëfinancimi i të dyja vendeve. Pra, buxheti i përgjithshëm për vitin 2016 për këtë program është në vlerën 2 milionë euro për të dyja vendet. Rreth 85 për qind e financimit është grant i BE-së dhe rreth 15 për qind është bashkëfinancim kombëtar. Shuma e financimit prej 2 milionë eurosh do të përdoret për financimin e projekteve, në përputhje me fushat prioritare të programit. Projektet do të përzgjidhen pas një procesi transparent aplikimi. Pritshmëritë janë që vendi ynë të përfitojë një grant prej 850 mijë eurosh, përfituesit e të cilit do të jenë jo vetëm institucionet buxhetore, por edhe organizatat e shoqatat jofitimprurëse.

Programi që parashikohet të financohet me këtë marrëveshje është pjesë e programit të bashkëpunimit të vendit tonë me Malin e Zi për periudhën 2014-2020, i cili parashikon një financim nga BE-ja prej 11.9 milionë eurosh. Ky financim detajohet në marrëveshjet specifike, siç është marrëveshja që po ratifikohet me këtë projektligj, marrëveshja e ratifikuar më parë për alokimet e viteve 2014 dhe 2015, si dhe marrëveshje të tjera që do të ratifikohen në vijim. Përfitues të këtij programi në vendin tonë janë zonat e Shkodrës, Lezhës dhe Tropojës, ndërsa në Malin e Zi janë rreth 12 zona.

III. Mendimi i Komisionit.

Marrëveshja që parashikohet të ratifikohet me këtë projektligj është mjaft e rëndësishme, pasi do të ndihmojë në përfitimin e grantit nga BE për realizimin e një pjese të programit disavjeçar të bashkëpunimit me Malin e Zi. Ky financim do të ndihmojë në zhvillimin ekonomik e social të zonave ndërkufitare të të dyja vendeve, që janë pjesë e programit, veçanërisht në fushat e mbrojtjes së mjedisit, zhvillimit të turizmit, të trashëgimisë kulturore dhe nxitjes së punësimit. Realizimi i kësaj marrëveshjeje siguron vijimësinë e programit të bashkëpunimit me Malin e Zi deri në vitin 2020.

Duke qenë se shuma e financimit do të detajohet sipas projekteve, është e nevojshme që strukturat ekzekutive të rrisin mbështetjen ndaj hartuesve dhe propozuesve të projekteve, për të mundësuar përthithjen e projekteve më cilësore, zbatimi i të cilave çon në realizimin me sukses të programit.

IV. Përfundim.

Mbështetur në argumentet e mësipërme, Komisioni e miratoi projektligjin me të gjitha votat e deputetëve të pranishëm në mbledhje.

RELATORJA
Evis KUSHI

KRYETARI
Erion BRAÇE